

## **Xojon carta-la San Pablo xi kiskiì ítjòn-la xita naxandá-la Cristo xi títsajna Tesalónica**

*Kó tsò Pablo nga síhixat'aà jñà xita naxandá-la Cristo xi títsajna Tesalónica*

<sup>1</sup> Jñò xi xita naxandá-la Nainá maà xi titsajnaà ya naxandá Tesalónica nga ya titsajnakjoòkoo Nainá xi Na'èn-ná kò jè Jesucristo xi otíxoma-ná, 'an xi 'mì-na Pablo titsanìhixot'aà-nòjen kò Silvano [tjé-ne xi 'mì Silas] kò Timoteo. Nainá kàtatsjá-nò kjondaà kò kjoa'nchán ya jjiìn inima-nò.

*Kó tsò Pablo nga tsjá-la kjondaà Nainá*

<sup>2</sup> K'e nga nokjoàt'aà-lajen Nainá, kjit'aà nachrjein 'biì-lajen kjondaà it'aà tsajòn. <sup>3</sup> Bítseèn-najen nga nguixkon Nainá xi Na'èn-ná koni s'ín nga titsanìxá, koií kjoa-la nga mokjeiìn-nò it'aà ts'e Cristo, tikoà ndaà nìxá-là xita xi kjejí nga matsjacha, nga tikoà kixi titsajnaà nga titsachiñà-là Jesucristo xi otíxoma-ná. <sup>4</sup> Ndí 'ndsè, Nainá matsjakeè-nò. 'Ya-nájen nga xó k'oas'ín jaàjiìn-nò nga xita naxandá-la komaà. <sup>5</sup> Nga jè 'én ndaà-la Nainá xi kjoa ts'e Cristo xi tsibènojmi-nòjen, mìtsà ta 'én tsajen xi kinokjoáko-nòjen. Jè Inima Tsjeè-la Nainá kitsjaà-najen nga'ñó, kò tikoà 'ñó ndaà kjòchija-najen nga nguì kixi kjoa. Jñò, ndaà ki'yaà k'e nga ya tsakítsajna-jen, ndaà kinìchjít'aà-nòjen xi kjondaà tsajòn.

<sup>6</sup> Jñò, k'oaá s'ín ki'nè koni s'ín ki'nè-jen kò koni s'ín s'ín Cristo. Jè Inima Tsjeè-la Nainá kitsjaà-nò kjotsja nga komà kichjoétjò 'én-la Nainá nas'ín 'ñó tse kjo'in tsatojioòn. <sup>7</sup> K'oaá ma-ne jñò tsakoò jngoò-là kjoa xi ndaà tjin nga kiskingui ngats'iì xita xi jye kòkjeiín-la 'én-la Nainá ya nangui Macedonia kò Acaya. <sup>8</sup> Nga yaá kjòts'ia-ne it'aà tsajòn nga tsabíson jè 'én ndaà-la Na'èn-ná; mitsà tà ya nangui Macedonia kò Acaya; xki xi ján kina'yà-la nga jñò, ndaà mokjeiín-nò it'aà ts'e Nainá. K'oaá ma-ne nga mì tì kii mochjeén-ne nga ngajen kénojmi-lajen xita it'aà tsajòn, nga jyeé beè-nò xita. <sup>9</sup> Nga tijña bénojmi-ne nga ndaà kichjoétjò-nájen k'e nga ijchochoòn-nòjen. Tikoáá tsò-né nga jñò jyeé kinikijna kjoa ts'e xkòsòn. I'ndeji jyeé ya tjaat'aà-là xi ngui jè sobà Nainá xi kixi kjoa nga tijnakon. <sup>10</sup> Tikoáá bénojmi-né nga titsachiña-là Ki'ndí-la Nainá nga kitjojen ijngoò k'a-ne ngajmii, jè xi tijè-ne Jesús xi Nainá kisikjaáya-la k'e nga k'en, nga jè-né xi kochrjekàjiìn-ná kjo'in ts'e kjoajti-la Nainá xi sa nchrobá.

## 2

### *Xá xi kis'iìn Pablo ya naxandá Tesalónica*

<sup>1</sup> Jñò ndí 'ndsè kò ndí tichjaá, 'ya-nò k'e nga ijchochón-nòjen mitsà ta kjotjò. <sup>2</sup> Nga jyeé ndaà tjiìn-nò koni s'ín komàt'in-jen ján naxandá Filipos, nga 'ñó tse kjo'in kinikjeiín-jen; 'ñó kijtseètoòn-najen xita; tanga Nainá kisichját'aà-najen nga kitsjaà-najen nga'ñó nga komà tsanguì-jen ya naxandá-nò nga komà

tsibènojímí-nòjèn 'én ndaà-la Nainá nas'ín 'ñó kjin ma kondra-najen. <sup>3</sup> Nga 'én kixíí kinokjoàya-jen, mìtsà jò tjin inima-najen nga tsibènojímí-nòjèn, tikoá mìtsà xitá kichonachan-lajen. <sup>4</sup> Nga Nainá jyeé kiskoòt'aà-najen kò k'oaá kitsò nga ok'ín-najen nga ngajen kjòngatsja-jen 'én ndaà-la Nainá xi kjoá ts'e Cristo mé-ne nga koma kinókjoàya-jen. Mitsà jè xi mejèn-najen nga ndaà kitsajna-jen nguixkon xitá; jè-né nga ndaà kitsajna-jen nguixkon Nainá nga jè xi tibeè inima-ná. <sup>5</sup> Jyeé ndaà tjiin-nò nga mìtsà 'én tsjén nokjoà-jen koni tsà mé xi mejèn-najen nga k'oi-najen, tikoáá mìtsà ton binchaàtsji'ma-jen. Kjoá koi, Nainá tibeè-né. <sup>6</sup> Mitsà jè binchaàtsji-jen nga jñò, kò xitá xi kj'eíí, nga 'nga sikkítsajna-najen. Tsà jin xi mejèn-najen nga tsibènè-nòjèn kjotíxoma xi tjin-najen nga it'aà ts'e Cristo kisixáya-najen, komaá-la okinikò-nòjèn. <sup>7</sup> Tanga mìtsà kós'ín kinikò-nòjèn. Ta saá k'oas'ín kinikò-nòjèn koni ndí ixti. K'oaá ngaya-la koni jngoò nea xi síkaki ixti-la nga ndaà síjchá ixti-la. <sup>8</sup> 'Ñó tjòcha ki'ya-nòjèn. K'oaá ma-ne nga kò kjotsja-najen tsibènojímí-nòjèn 'én ndaà-la Nainá xi kjoá ts'e Cristo. Tikoáá matsjaá-najen nga ndaà kinikò-nòjèn nita mé kjoá xi komàt'ioòn ta koií kjoá-la nga 'ñó matsjacha-nòjèn. <sup>9</sup> Ndí 'ndsè kò ndí tichjaá, bítsjeèn-nò kós'ín kinixá-jen nga binchaàtsji'a-jen yijo-najen. Kò nachrjein kò nitjen nixá-jen, mé-ne nga mì jñò sijti-nòjèn jña nachrjein k'e nga kinokjoàyajin-nòjèn 'én ndaà-la Nainá.

<sup>10</sup> Jñò, ndaà ki'yaà, tikoáá Nainá kijtseè-né, nga

ngajen ndaà kinìkò-nòjen. K'oaá s'ín kinìkò-nòjen koni s'ín sasén-la Nainá koni s'ín tjín xi kjoa kixi. Kò niyá xi jé kòònè-najen koni s'ín kinìkò-nòjen jñò xi mokjeiin-nò 'én ndaà-la Nainá. <sup>11</sup> Tìkooá jyeé ndaà tíjìn-nò nga jen, ndaà kinìkò-nòjen nga jngoò ìjngoò koni s'ín síkò ìxti-la jngoò xita xi na'èn ma. <sup>12</sup> Kinije ikon-nòjen koa kinì'ñójìn-jen takòn kò k'oas'ín tsibìnè-nòjen nga k'oas'ín s'een koni s'ín ok'in-la xi xita-la Nainá maà; nga jè-né xi síkí'nchré-nò nga ya titsajnajìn-là xita xi jye jè tíhotíxoma-la kò tìkoo ya titsajnajñò kjoajeya-la.

<sup>13</sup> Kjit'aà nàchrjein 'biì-lajen kjondaà Nainá koni s'ín ndaà kichjoétjò 'én-la nga mìtsà k'oas'ín kichjoétjò koni 'én-la xi taxki xita. K'oaá s'ín kichjoétjò koni tjín xi nguì kjoa kixi nga 'én-la Nainá-né. Jñà 'én koi, tí'yaá-la nga nchisíxájin inima-nò jñò xi mokjeiin-nò. <sup>14</sup> Jñò ndí 'ndsè kò ndí tichjaá, k'oaá s'ín komàt'ioòn koni s'ín komàt'in jñà xita naxandá-la Nainá xi mokjeiin-la it'aà ts'e Cristo Jesús xi títsajna ján nangui Judea. Tíjñà-ne xita naxandá judío xíkjin kùtjingui kondra-la. Jñò tíjñà-ne xita naxandá tsajòn kùtjingui kondra-nò. <sup>15</sup> Jñà xita judío kisik'en Na'èn-ná Jesús kò tíjñà-ne xita jchínga-la kisik'en jñà xita xi kùchjaya ngajo-la Nainá kjòtsee. I'ndeì, tákó k'oaá síkò-najen nga fitjingui kondra-najen. Nainá mìkiì sasén-la kjoa xi s'ín xita koi, nguì kondraá fi-la ngats'ì kjoa, <sup>16</sup> nga mìkiì tsjá'nde nga nokjoà-lajen jñà xi mìtsà xita judío mé-ne nga tìkooa kítjokàjin-ne kjo'in. K'oaá ma-ne xita koi, skanda nchisíkatonè-la nga ótsji jé-la yijo-la. Jyeé kjomeè f'ìikanè-la kjo'in xi tjìkò kjojtì-la Nainá.

*Kó kitsò Pablo nga mejèn-la kjikon jñà xita-la Cristo xi títajna ya naxandá Tesalónica*

<sup>17</sup> Ndseé kò tichjaá, k'e nga chinchat'aaxìn chiba naxrjein-nòjen, nas'ín mì tì kii kiyaxkon-ná xinguiáá, ngajen 'ñó nìkítsjeèn-nòjen. 'Ñó mejèn-najen nga onguíchoòn-nòjen. <sup>18</sup> Mejèn tsanguì-jen. 'An xi 'mì-na Pablo, kjin k'a mejèn kiaà, tanga jè xita neí mìkii kitsjaà'nde-najen. <sup>19</sup> Kjoa tsajòn-nò nga titsachiñá-lajen nga 'ñó kotsja-najen kò nga ndaà kitjo-jen k'e nga kjoí ìjngò k'a Na'èn-ná Jesucristo. <sup>20</sup> Kixí kjoa it'aà tsajòn-nò nga ndaà kitjongui-jen kò nga s'e-najen kjoa tsja.

### 3

*Mé-ne ya kinikasén-ne Timoteo ján naxandá Tesalónica*

<sup>1</sup> K'e nga mì tì kii komà kichikjoa isa-najen nga mejèn-najen sijin-najen kó s'ín titsajnaà ján Tesalónica, k'oaá komà-ne nga kichibàya-najen nga kinikasén-jen jè 'ndsè Timoteo, kò ngajen yaá tsitsajna-jen Atenas. <sup>2</sup> Kinikasén-jen jè 'ndseé Timoteo, chi'nda-la Nainá-né nga tikoáá chjaya 'én ndaà-la Nainá xi kjoa ts'e Cristo koni ngajen. Koií xá kiiikon-nò mé-ne nga kàtatsjá-isa-nò nga'ñó nga isa 'ñó ndaà kixi kitsajnaà koni s'ín mokjeiin-nò, <sup>3</sup> mé-ne nga nijngò xi sihindaà-ne kjoa ts'e kjo'in xi titsanikjioòn. Jñò, jyeé ndaà tíjin-nò nga k'oaá s'ín tjinè-la nga kos'ín komat'iaán. <sup>4</sup> K'e nga tisa ya titsajnakò-nòjen, k'oaá ki'mi-nòjen nga kjo'íin s'e-ná. I'ndeí, jyeé tisa'yaà nga k'oaá s'ín tímat'ioòn. <sup>5</sup> Koií kjoa-la nga mì tì kii

kiskoòñà kjoa-na; kisikasén Timoteo nga mejèn-na skoeè kós'ín títsajnakoo jè 'én xi mokjeiín-nò. Tìmakájno-na tsà jye kiskoònachan-nò jè xítà neíí. Tsà koií nachrjein-la, xá xi ki'nè-jen, tsà ta kichijà-né.

<sup>6</sup> I'ndeí, jè Timoteo jyeé j'ìi-ne nga kii Tesalónica; ndaà tsò okixi xi 'ya-najen it'aà tsajòn koni s'ín mokjeiín-nò kò nga tjín-nò kjòtsjacha. K'oaá s'ín tsibénojmi-najen nga kjit'aà nachrjein tsjaá ma-nò nga níkijsjeèn-nájen. Tìkoaá mejèn-nò nga jchaxkoòn-nájen koni ngajen tìkoaá mejèn-najen jchaxkoòn-nòjen. <sup>7</sup> K'oaá ma-ne ndí 'ndsè kò ndí tichjaá, nas'ín kjo'in kò kjoa kondra títsajnajin-jen, k'e nga kina'yà-jen it'aà tsajòn nga 'ñó ndaà mokjeiín-nò it'aà ts'e Cristo, tìkoaá ngajen, 'ñó ndaà kjòtsja-najen. <sup>8</sup> K'e nga kina'yà-jen nga kixi onguít'aà-là Na'èn-ná, ngajen jyeé mì tì mé makájno-najen. <sup>9</sup> Ngajen, 'ñó tse kjòtsja tjín-najen nga nguixkon Nainá xi kjoa tsajòn skanda mì-la kii kjoehet'aà nachrjein nga k'oi-lajen kjondaà Nainá. <sup>10</sup> Kò nachrjein kò nitjen nokjoat'aà-lajen Nainá mé-ne nga tsjá'nde-ne nga koma konguíchoòn-nòjen. Tìkoa koma kòkòya-ìsa-nòjen mé-ne nga kojngòò-ne 'én xi chijat'aà-nò koni s'ín mokjeiín-nò.

### *Kjoa bítsi'ba-la Pablo*

<sup>11</sup> Mejèn-najen nga tijè-ne Na'èn-ná xi Nainá kò jè Jesucristo xi otíxoma-ná, kàtatsjá'nde-najen nga koma konguíchoòn-nòjen. <sup>12</sup> Jè kjòtsjacha-la Na'èn-ná ìsa ndaà kàtasijiin inima-nò, mé-ne nga ìsa ndaà kòtsjacha-nò xinguiqo kò ngats'ìi xítà xi kj'eíí, koni ngajen, ndaà matsjacha-nòjen.

13 Jè Na'èn-ná kàtatsjá-là nga'ño inima-nò mé-ne nga nimé jé sakòt'aà-nò kò tsjeè kitsajnaà nga nguixkon Nainá xi Na'èn-ná k'e nga kjoí iŋgoò k'a-ne Jesucristo xi otíxoma-ná nga tjikò ngats'ì xi ya chja-ne.

## 4

### *Kjoa xi sasén-la Nainá*

1 Ndí 'ndsè kò ndí tichjaá, k'oaá s'ín tsakoóya-nòjen nga k'oas'ín sijchá yijo-nò koni s'ín sasén-la Nainá. Kò kixí kjoa, jyeé kos'ín títsa'nè. Tanga i'ndeí bítsi'ba-nòjen tikoá binè-nòjen it'aà ts'e Jesús xi otíxoma-ná nga isá 'ño ndaà tji-là nga'ño yijo-nò nga kos'ín tikitasòn.

2 Jyeé tíjin-nò kó s'ín tjin kjotíxoma xi kits'ì-nòjen koni s'ín kitsjaà-najen Jesucristo xi otíxoma-ná. 3 Jè xi mejèn-la Nainá nga nguì tsjeè sijchá yijo-nò, mì tì kjoa chijngui sis'in-là. 4 Nga jngoò iŋgoò-nò tikindaá yijo-nò; k'oas'ín tikjeén nga nguì tsjeè títsajna koni s'ín sasén-la Nainá. 5 Kì biì'nde-là nga síkijne-nò jña kjoa ch'o xi síjé yijo-nò koni s'ín jña xita xi mìkì beèxkon Nainá. 6 Jño xi 'ndseé chibá it'aà ts'e Cristo, k'oaá tjin kjoa xi kaajñoò mé-ne nga mì xinguiò chónachan-là nga mì xinguiò jchatoòn. Tsà k'oas'ín s'een, kjo'íin tsjá-nò Nainá. Jyeé k'oas'ín tsibènojmi-nòjen. 7 Nainá mìtsà koi xá kiichja-ná nga ch'o s'eén, jè xi mejèn-la nga tsjeè kitsajnaá. 8 Jè xi ochrjekàngui kjoa koi, mìtsà kjohitsjeèn ts'e xita ochrjekàngui, kjohitsjeèn ts'e Nainá ochrjekàngui; nga jè xi tsjá-nò Inima Tsjeè-la.

<sup>9</sup> Mìkiì mochjeén nga xojon skiit'aà-ìsa-nò xi ts'e kjoatjòcha. Nainá jye tsakóya-nò kós'ín sítjòchaà xinguiòo nga jngoò ìjngoò. <sup>10</sup> Jyeé kos'ín títsajna nga matsjacha ngats'ìi xítà xinguiòo xi títsajna kóhokji ya nangui Macedonia. Tanga k'oaá s'ín bìtsi'ba-nòjen nga ìsa ndaà títsajna xinguiòo. <sup>11</sup> Tìnè-là yijo-nò nga 'nchán títsajna, kì kjoa-la xinguiòo chingàjñò, t'een xá-nò koni tjin xá xi ma-nò, koni s'ín jye ki'mì-nòjen ngats'ìi kjoa koi. <sup>12</sup> Mé-ne nga skoexkón-nò jñà xítà xi mìkiì mokjeiín-la 'én-la Nainá. Koa jñò, nímé chijat'aà-nò.

### *K'e nga kjoí ìjngoò k'a-ne Na'èn-ná Jesucristo*

<sup>13</sup> Ndí 'ndse kò ndí tichjaá, mejèn-najen nga kátasijìn-nò mé kjoa xi mat'in jngoò xítà xi biyaà, mé-ne nga mì kobaá-nò koni jñà xítà xi nímé nchikoña-la. <sup>14</sup> Koni s'ín mokjeiín-ná nga Jesús k'en, ìkjoàn jaáya-la, k'oa tís'ín mokjeiín-ná nga Nainá sùkjaáya-la xítà xi jye k'en, jñà xi mokjeiín-la it'aà ts'e Jesús.

<sup>15</sup> Nga koií 'én bènojmiya-jen koni tsò 'én xi tsibíjna Jesús nga jñá xi títsajnakoaán skanda k'e nga kjoí ìjngoò k'a Na'èn-ná Jesucristo, mìtsà jñá kjiín ítjòn-lá jñà xi jye k'en. <sup>16</sup> Nga jè sobà Na'èn-ná kítjojen ìjngoò k'a-ne ngajmii; 'ñó kichja nga tsjá okixi, kiná'ya jngoò-la jta ts'e àkjale ítjòn, kò kiná'ya-la chrjo-la Nainá; ìkjoàn jñà xítà xi jye k'en nga mokjeiín-la it'aà ts'e Cristo, kjoaáya ítjòn-la. <sup>17</sup> Ìkjoàn jñá xi tákó títsajnakoaán jè nàchrjein jè, yaá tjámijìn-tjen-koaá ijìn ifi nga kixokjoá Nainá ya ijìn isén. K'oaá s'ín koma nga ya kítsajnakoaá Nainá nità mé nàchrjein-ne. <sup>18</sup> K'oaá ma-ne nga



tije takòn xinguiᵒo nga tènᵒjmiya-là koni tsò jñà 'én koi.

## 5

<sup>1</sup> Ndí 'ndsè kᵒ ndí tichjaá, mìkìl mochjeén nga xᵒjᵒn sít'aà-nò mé nàchrjein-ne nga ᵒkᵒma. <sup>2</sup> Jñò, nga jyeé ndaà tíjìn-nò, jè nàchrjein k'e nga kjoíi ìjngòè k'a Na'èn-ná Jesucristo, k'oaá s'ín kjoíi koni jngòè xítà chijé xi f'ùì nga nítjᵒn k'e nga nìyá xi nchikoñaá-là. <sup>3</sup> K'e nga kítso jñà xítà: “Nchán títsajnaá, nímé kjoa tjin.” K'ee tà nítᵒón kítjᵒjᵒnè-là kjoxkón koni s'ín mat'in jngòè chjᵒón xi bijchó nàchrjein-là nga ki'ndí 'beé, mìkìl kojno-là. <sup>4</sup> Tanga jñò ndí 'ndsè kᵒ ndí tichjaá, mìtsà ijìin jñò títsajnaà jñò. Kᵒ k'oaá ma-ne nga mì k'oaá s'ín komat'ioòn jè nàchrjein jè, koni ma k'e nga ta nítᵒón fì jngòè xítà chijé. <sup>5</sup> Tanga jñò, ngats'ioò, iseèn choòn ñánda títsajnaà, kᵒ nàchrjein-né. Nga jñá, mìtsà ijìin jñò títsajnaá kᵒ mìtsà nítjᵒn títsajnaá. <sup>6</sup> K'oaá ma-ne nga mìkìl k'oa s'een koni s'ín xítà xi kj'eíi nga mì títsajnandaà-jèn mé kjoa xi tjin k'oaá ngaya-là koni tsà kjiyijòfè. Mochjeén-né nga kítsajnandaá koni jngòè xítà xi tíjnakon, xi nguì ndaà tjin ikon. <sup>7</sup> Nga jñà xítà xi oyijòfè, k'ee oyijòfè k'e nga jñò. Kᵒ jñà xi mach'i, k'ee mach'i k'e nga jñò. <sup>8</sup> Tanga jñá, yaá títsajnaá ñánda iseèn choòn. K'oaá ma-ne nga ndaà sijchá yijo-ná. Jè 'én xi mokjeín-ná kᵒ jè kjoatjòcha, jñà kᵒsìkᵒ inìma-ná koni jngòè soldado xi ndaà kijtisa inìma-là jè chrjoa xi 'mì coraza. Kᵒ k'e nga nguì tíjngòè takoán nga chiñá-lá jè nàchrjein k'e nga kítjokàjñaá kjo'in, jè ngaya-là tsí'nguién kichà xi osìkᵒ skᵒ soldado. <sup>9</sup> Nainá mìtsà koi xá

jaajìin-ná nga kjo'in tsjá-ná, jé-né nga kitjokàjñáá kjo'in it'aà ts'e Jesucristo xi otíxoma-ná. <sup>10</sup> Nga jè k'en ngajo-ná mé-ne k'e nga kjoijì ìjngoò k'a-ne, tsà titsajnakoaán, kò tsà jye k'eén, yaá kitsajnakoaá. <sup>11</sup> K'oaá ma-ne nga tjetakòn kò tjiì-la nga'ño xinguiò koni s'ín jye títsa'nè.

*Kjotíxoma xi kitsjaà Pablo*

<sup>12</sup> Ndí 'ndsè kò ndí tichjaá, nìjé-nòjen kjondaà, jchaxkón xitá xi síxáko-nò nga jñà títsajna ítjòn ya jjiìn naxandá-la Nainá kò nga okóya-nò. <sup>13</sup> Ndaà jchaxkón tikoà ndaà tìtsjacha xitá koi, jè kjoa-la xá xi s'ín. 'Nchán titsajnakoo xinguiò.

<sup>14</sup> K'oa tís'ín bìtsi'ba-nòjen ndí 'ndsè kò ndí tichjaá, kot'in-là nga kàtasíxá jñà xitá xi ta jyò tjíma nga majìn-la síxá; tì'ño ikon jñà xi indaà tjin ikon; tìchját'aà-là jñà xi tsjìn-la nga'ño ya jjiìn inima-la; kò kàtas'e-nò kjoatsejta it'aà ts'e ngats'ii xitá-la Nainá.

<sup>15</sup> Tsà k'e nga mé kjoa xi ch'o síko-nò xitá xi kj'eíí, tìkindaa xinguiò nga mì sijnà ngajo-ne. Ta saá tinè-là yijo-nò nga kjit'aà nachrjein ndaà tìkoo xinguiò kò ngats'ii xitá xi kj'eíí.

<sup>16</sup> Kjit'aà nachrjein tsja t'è-là inima-nò. <sup>17</sup> Titsi'ba kjit'aà-là Nainá. <sup>18</sup> Nita mé kjoa-ne, tjiì kjit'aà-là kjondaà Nainá. K'oaá s'ín mejèn-la Nainá nga k'oas'ín s'een ngats'ioò xi mokjeiìn-nò it'aà ts'e Cristo Jesús.

<sup>19</sup> Kì bichjoá ikòn-là xá xi s'ín Inima Tsjeè-la Nainá. <sup>20</sup> Kì nachrjekànguiò 'én-la xitá xi chja ngajo-la Nainá. <sup>21</sup> Ndaà ndaà chít'aà yije ngats'ii 'én. Jñà tìkítsajnatjò xi ndaà tsò. <sup>22</sup> Ngats'ii xi ch'o tsò, kì kii nìkitasòn.

<sup>23</sup> Jè Nainá xi tsjá kjoa'nchán, jngoò k'a tsjeè kàtasíkítsajna-nò. Ndaà kàtasíkinda inima-nò, yijo-nò ko kjohítsjeèn-nò mé-ne nga nimé jé s'e-nò jè načrjein k'e nga kjoí l'jngoò k'a jè Jesucristo xi otíxoma-ná. <sup>24</sup> Nga xita kixi-né jè Nainá xi xó kiichja-nò, siikitasòn yijeé kjoa koi.

*Kó kitsò Pablo nga síhixat'aà xita*

<sup>25</sup> 'Ndseé ko tichjaá, titsi'batji-nájen.

<sup>26</sup> Tixot'aà ngats'ì xita 'ndseé nga nguì ko inima-nò.

<sup>27</sup> 'An, tsja-nò okixi nga nguixkon Na'èn-ná nga kàtaxkejiìn-la xojon jè ngats'ì xita naxandá-la Nainá.

<sup>28</sup> Jè kàtijnako-nò kjondaà-la Jesucristo xi otíxoma-ná.

**'Én-lá Nainá xi kjoa ts'e Jesucristo**  
**New Testament in Mazatec, San Jerónimo Tecóatl**  
**Mazateco de S Jeronimo Tecoatl; maa**  
**(MX:maa:Mazatec, San Jerónimo Tecóatl)**

copyright © 2013 Wycliffe Bible Translators, Inc.

Language: Mazatec, San Jerónimo Tecóatl

Translation by: Wycliffe Bible Translators, Inc.

Mazateco, San Jerónimo Tecóatl [maa], Mexico

**Copyright Information**

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mazatec, San Jerónimo Tecóatl

**© 2013, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 13 Jul 2024 from source files  
dated 29 Jan 2022

9f778253-d34e-5037-af35-7bca16479aa0